

DOVBLE DE LA

RESPONSE

3062

H DE LA ROYNE RE-
GENTE, MERE DV ROY,
à la lettre escrite à sa Majesté,
par Monseigneur le Prince de
Condé, le dixneufiesme de
Fcurier 1614.

1614



A PARIS,
Chez F. MOREL & P. METTAYER,
Imprimeurs & Libraires ordi-
naires du Roy.

M. DCXIII.

Avec Privilege de sa Maiesté.

64

THE ROYAL

ACADEMY OF SCIENCES

OF THE CITY OF PARIS

IN THE YEAR 1800

BY THE ORDER OF THE

ACADEMY OF SCIENCES

OF THE CITY OF PARIS

IN THE YEAR 1800

BY THE ORDER OF THE

ACADEMY OF SCIENCES

OF THE CITY OF PARIS

IN THE YEAR 1800

BY THE ORDER OF THE

ACADEMY OF SCIENCES

OF THE CITY OF PARIS

IN THE YEAR 1800

BY THE ORDER OF THE

ACADEMY OF SCIENCES

OF THE CITY OF PARIS



DOVBLE DE LA RES-
PONSE DE LA ROYNE RE-
gente, Mere du Roy, à la lettre
escrite à sa Majesté, par Mon-
seigneur le Prince de Condé, le
dixneufiesme de Feurier 1614.



ON Nepueu, Vostre lettre
escrite à Mezieres le dixneu-
fiesme de ce mois, m'a esté
presentee le vingt & vnies-
me. Elle contient plusieurs
chefs, ausquels ie voulois at-
tendre à respondre particu-
lierement lors que les Estats
generaux du Royaume seroient assemblez, puis
que le Roy, Monsieur mon fils, & moy auions ja
arresté par l'aduis des Princes & Officiers de la
Couronne, & autres principaux Conseillers du
Roy, mōdit sieur & fils, qui sont auprez de nous,
d'en faire la conuocation, dont nous auions don-
né aduis par les Prouinces deuant la reception de
vostredicte lettre, comme vous eussiez appris de
mon Cousin le Duc de Vantadour & du sieur de

Boiffize, que i'auois depeschez vers vous, si vous ne fussiez party de vostre maison de Chasteau-roux pour passer en Champagne, comme vous auez fait (sans nous en donner aduis) au mesme temps qu'ils s'acheminoient à vous. Ou si depuis vous leur eussiez mandé approuuer qu'ils fussent allez où vous estes, comme ils s'y sont offerts par leurs lettres, qui vous ont esté portees par homme exprés. I'ay eu à plaisir de cognoistre par la lecture de vostre dite lettre, que vous approuuez ladite assemblee: car c'est vn bon remede pour pouruoir aux desordres que vous dites auoir cours dedans le Royaume: C'est aussi celuy qui a tousiours esté plus estimé & desiré de moy, & duquel ie faisois bien estat d'vser à l'entree de la majorité du Roy mondit sieur & fils, pour luy représenter en vne si notable compagnie le passé de ma Regence, l'informer du present, & mieux reigler toutes choses pour l'aduenir, que ie n'aye peu faire, à mon grand regret, durant mon administration. Mais comme depuis vous auez enuoyé vne copie de ladite lettre à Messieurs de la Cour de Parlement de ceste ville, i'ay creu que vous la diuulgueriez encores par toutes les autres compagnies & Prouinces du Royaume, pour, en mesme tēps, descrire par tout, comme il semble que vous pretendez faire icy, la direction & conduite des affaires publiques auprés de moy, à mon desauantage: Car les plaintes que vous faiçtes des desordres que vous attribuez à ceux qui seruent le Roy auprez de moy, s'adressent plus à moy qu'à eux. C'est vn artifice dont l'on vſe à poste, pour don-

ner aux subjets du Roy vne mauuaise odeur & impression de mes actions. C'est pourquoy i'ay bien voulu, en attendant la tenuë desdits Estats generaux, que i'aduanceray tant que ie pourray, vous faire sçauoir, par aduance, ce qui est contenu en la presente. Je commenceray doncques par vous dire, mon Nepueu, que vous, & toute la France, estes obligez, quoy, que vous puissiez dire, & publier au contraire, de recognoistre, & confesser que le Royaume a par la singuliere grace de Dieu, & l'assistance que i'ay receuë des gens de bien, iouïy en ma Regence, contre l'opinion commune, d'un repos general, & plus entier, que nous n'eussions osé esperer, après auoir perdu le feu Roy, mon Seigneur, que Dieu absolue (la seule presence duquel contenoit toutes sortes de personnes, en deuoir; & obeïssance) dont ie ne puis louer assez sa bonté, & prouidence diuine, & les bons François, de toutes qualitez, qui ont, en cela, fidellement seruy le Roy, mondit sieur & fils, au grand besoin que i'en ay eu: car chacun a sceu & veu quelles ont esté mes peines, mes combats & mes continuels trauaux, pour maintenir la tranquillité publique, qui est encores maintenant enuiee & trop rudement & ouuertement assaillie par ceux qui deuroient moins le faire. Ils ont commencé dès le sacre du Roy mondit sieur & fils, ont depuis continué, comme ils font encores, par l'ordre, & direction d'un mesme Conseil: I'aduouë librement auoir quelques fois eu recours à des moyens peu conuenables à la dignité du Roy, mondit sieur, & fils,

A iij

pour contenir & retenir en deuoir les auteurs de telles trauerses : mais ie l'ay faict pour esuiter pis. Ce qui a esté souuent aussi mal recognu, qu'il est à present mal interpreté par ceux mesmes qui en ont profité. C'est la cause principale des despences que vous nommez à present prodigalitez, que la necessité du Royaume a extorquées de moy, cõtre ma propre volonté, & qui n'eussẽt eu lieu, si vous m'eussiez aussi assiduellement fortifiée de vostre assistance, que ie l'ay desirée, & vous ay donné occasion de faire par l'entiere & honorable part que vous auez tousiours eue en la conduite des affaires, par preference à toutes autres, comme il est deub à vostre qualité : Mais ie ne puis que ie ne me plaigne à vous, de quoy vous auez laissé couler, & passer quatre années de ma Regence, sans m'auoir aduertie des maluersatiõs sur lesquelles vous fondez vostre mescontentement. Car si vous me les eussiez descouuertes, i'y eusse apporté l'ordre necessaire pour le bien du Royaume, auquel vous auez notable interest : Tellement qu'il semble que l'on ait voulu exprés faire vn amas de telles plaintes, (qui sont toutes-fois autant imaginaires que peu veritables,) pour donner pretexte aux factions, & mouuemens qui menacent le Royaume de desolation, ou de dissipation, au lieu d'vne reformation que vous dites rechercher. A quoy ie voy, avec desplaisir, que l'on vous engage contre vostre volonté : Car vous auez vn interest si remarquable, de cõseruer ceste Couronne entiere, & en felicité, que ie ne veux point douter que vostre intention ne tende à

7
toute autre chose: Mais pour y paruenir plus hō-
norablement, & vtilement; vous ne deuiez vous
esloigner de moy, ny commencer par former v-
ne societé qui en engendrera d'autres. Car tou-
tes diuisions, & partialitez en vn Royaume sont
de tres-dangereuse consequence. Tant s'en faut
que i'en aye approuué vne seule, que ie les ay tou-
tes detestées, principalement si tost que ie me
suis apperceuë que l'on vouloit s'en seruir, plus
pour aduantager les particuliers, que pour bien
faire au seruice du Roy: Au contraire, i'ay tou-
siours desiré, comme ie fais encores, de moyen-
ner de tout mon pouuoir, vne bonne intelligen-
ce entre tous les Princes, Officiers de la Couron-
ne, & les autres seigneurs du Royaume. Mais i'y
ay tousiours esté trauerfée, & empeschée par les
mesmes inuentions, & artifices de ceux qui fo-
mentent encores à present celle qui se presente.
Et toutesfois ils osent encores imputer aux
conseils que i'ay suivis, les factions que ie
condamne, dequoy i'ay souuent faict plainte à
ceux que i'ay estimez y pouuoir apporter quel-
que remede: Si i'ay commandé l'observation
exacte des Edicts faicts par le feu Roy, pour as-
seurer la paix du Royaume, ainsi que i'ay souuent
fait & reiteré avec grand soin, affection, & sin-
cerité. L'on a publié que ie faisois tels comman-
demens si precis, exprés pour mieux surprendre
ceux de la Religion pretenduë reformée, qui s'y
endormiroient. Et s'est on seruy, pour les ombrager
d'auantage, des alliances que nous auons trai-
ctées du costé d'Espagne, comme si elles estoient

basties exprés contr'eux, & leur a-on aussi celé, ou
 desguise à mesme fin, celle que nous traictons à
 present en Angleterre, par vostre aduis, de laquelle
 mon Cousin le Duc de Bouillon a esté le prin-
 cipal entremetteur. D'ailleurs, si quelques fois
 i'ay vsé d'indulgence à l'endroit d'aucuns de ladi-
 te Religion, apres auoir commis quelque excez
 contre la iustice, la raison, & lesdits Edicts, ils
 ont blasmé ma tolerance, & patience, l'ont des-
 crieé, & interpretée à mauuaise fin. Et toutes-
 fois il est certain, si vous auez esté aupres de moy,
 quand tels accidens sont arriuez, n'auoir en tels
 cas, ny autres qui ont concerné le public, rien
 ordonné à vostre desceu. Telles personnes euf-
 sent peut estre desiré que i'eusse vsé de plus gran-
 de seuerité en telles rencontres, tant par ven-
 geance particuliere, que pour engendrer noise,
 ennuyez de la durée de la concorde & paix du
 Royaume. Que n'a-il esté tenté, & inuenté pour
 exciter des mescontentemens, former des partia-
 litez & factions, émouuoir les peuples à seditiō
 par diuers moyens, par gens impatiens de voir
 croistre le Roy, avec son aage, en iugement, cou-
 rage, & en la cognoissance du bien, & du mal qu'il
 reçoit de ses seruiteurs, & subiects. Tels offices
 ont esté faicts curieusement, pour, en trauersant
 la conduite des affaires publiques, establir celles
 des particuliers : Et tout ainsi que i'ay trauaillé
 sincerement à maintenir la paix du Royaume, en
 faisant exactement obseruer & executer lesdits
 Edicts; i'en ay pas esté moins soigneuse & dili-
 gente à conseruer les amitez des alliez, & con-
 federez

federez de la Couronne , tellement que i'en ay
 pluſtoſt accru , que diminué le nombre : Verita-
 blement i'ay preferé ladicte alliance d'Eſpagne à
 celle de Sauoye. Mais ie n'ay rien faiſt en cela
 que le feu Roy monſeigneur n'eult faiſt lors que
 Dom Pedro de Toledo vint vers luy de la part du
 Roy d'Eſpagne , s'il luy en eult faiſt l'ouuerture,
 comme il s'y attendoit. Depuis ie m'y ſuis con-
 duitte entièrement par l'aduiſ de feu mon Couſin
 le Comte de Soiſſons qui eſtoit aupres du Roy,
 quand la premiere propoſition enfut faite, laquel-
 le vous fuſt communiquée par moy , & par ledit
 Comte , à voſtre retour de Guyenne , & fuſt deſ-
 lors approuvée de vous , comme de luy , & de
 tous ceux qui en eurent cognoiſſance , comme
 vtile , bien proportionnée à l'aage , & à la gran-
 deur du Roy : Et puis affermer n'auoir eſté pouſ-
 ſée à ceſte preference par default d'affection , &
 bonne volonté enuers mon frere le Duc de Sa-
 uoye, & ſa maiſon , ny à autres fins que de la con-
 ſideration du merite d'une telle alliance , & de
 l'affermiſſement de la paix entre ces deux Roys,
 vtile à la Chreſtienté , & plus neceſſaire à l'Eſtat
 preſent des affaires du Royaume , qu'en autre fai-
 ſon. Dequoy ledit Duc de Bouillon fuſt chargé
 d'eſclaircir le Roy de la grande Bretagne , où le
 Roy , & moy l'enuoyasmes exprés pour faire cet
 office , qui fut rendu ſemblable en meſme temps
 aux autres Princes , Potentats , & allies de ceſte
 Couronne, qui ont tous monſtré les auoir receuz
 en bonne part : le diray dauantage, que les motifs
 du Conſeil qui en fut lors pris , n'ont eſté moins

considerables pour ledict Duc de Sauoye, & ses Estats, que pour la France, Vous en sçauiez les raisons comme moy. Mais tels blasment à presēt lefdits conseils, & mariages, qui ne feroient, peut estre, conscience de se preualoir au desaduantage du Roy, mondit sieur & fils, & du repos de la France, d'vne mauuaise intelligence entre ces deux Roys. C'est pourquoy ils vsent encores à present de toutes sortes d'artifices, & de diligences pour en retarder l'execution, en intention de les rompre du tout, s'ils le peuuent faire. Mais i'espere que nous sçaurons bien y remedier, avec l'aide de Dieu, qui fauorifera, s'il luy plaist, nos sinceres intentions, quin'ont autre but que de procurer le bien du Royaume, avec le contentement particulier du Roy, & le bien de ma fille aisnée, tout ainsi que i'espere faire pour la seconde, du costé d'Angleterre, dequoy vous ne faites mention par vostre dite lettre, cela nuiroit aussi au dessein de ceux qui vous conseillent : l'espere de sortir amiablement, à l'honneur du Roy, & au bien, & contentement de ses subiects, des differents de Nauarre, mesmes deuant que nous passions outre ausdits mariages, sinon, i'auray tel soin de conseruer, en ceste occasion, les droicts, les limites, & la reputation de la France, que ceux qui nous accusent de n'en auoir le soin que i'en dois auoir, auront occasion de s'en desdire, & de retrancher de leurs plaintes celles qu'ils fondent sur ce sujet. Mais quoy ? Ils voudroient desia nous voir aux prises, & aux armes avec le Roy d'Espagne, pour

s'en preualoir en leurs imaginations: Tant s'en faut aussi quel'on aye sujet de se plaindre de l'assistance du Roy, mondit sieur & fils, & de la mienne, aux affaires du Montferrat, que i'attendois des loüanges, & des remerciemens du soing que i'en ay eu. Car il est notoire à tous, si mō Neuen le Cardinal Duc de Mantouë (que i'affectionne beaucoup, avec toute sa maison, à cause de son affection enuers la France, & de nostre proximité) iouit à present de quelque allegement en ses affaires, il doit estre attribué au secours, & aux offices de vraye amitié, que le Roy, mondit sieur & fils, & moy, luy auons departis en ceste necessité, lesquels nous aurons tousiours à plaisir de luy continuer, autant que les affaires du Royaume nous le permettront. Car ie suis obligée, comme vous sçauiez, de preferer celle-cy à toutes autres, dequoy si i'vsois autrement, vous me blasmeriez avec raison le premier: Comme ie ne puis faire assez ceux qui reprennent, ou condamnent les deuoirs qui ont esté faicts pour faire considerer & poiser, comme il conuient, les raisons qui importent à la France, sur la nouuelle poursuite des Venitiens, pour le renouvellement de leur alliance, avec les Liges Grises, dignement représentées par l'Ambassadeur du Roy, qui reside ausdites Liges, deuât que d'y engager le nom, & la reputation du Roy: Consideriez ie vous prie, à quels termes de mesconnoissance enuers le bien public du Royaume, les passions priuées desuoyent ceux qui blasment nostre conduite en ce fait: Car ils veulent que ie passe par

dessus toutes sortes de raisons, & considerations, quelques importantes qu'elles soyent au Roy & au Royaume, pour suiure leurs opinions, soit pour flatter ladite republique, ou pour auoir sujet de fomentier & accroistre d'auantage la desiance desdites alliances d'Espagne, comme si la seule consideration des interets d'Espagne, nous retenoit de contenter ladite republique, & fauoriser ladite alliance, chose qui est tres-esloignée de la verité Mais il ne faut que lire les depesches de nostre Ambassadeur, & se ressouuenir des accidents suruenus à ceste nation Grisonne, après la premiere ligue de Venise, pour condamner la plaincte que l'on fait de ma conduite, en cecy. Ladite premiere ligue fust veritablement fauorisée par le feu Roy mais il s'en repentit assez quand il vid qu'elle preiudicioit à la sienne (qui couste cher à la France,) & auoit plongé ceste nation en des confusions & calamitez tres-grandes, dont la memoire leur est tous les iours rafraischie quand ils jettent les yeux sur le fort de Fuentes, basti à la frontiere de leur pays, après que ladite ligue de Venise fust faite, & à l'occasion d'icelle, Et neantmoins comme le Roy, mondit sieur & fils, & moy, desirons grandement fauoriser ladite republique, à l'imitation du feu Roy, & de ses predecesseurs. Nous auons ordonné que les capitulations de leur premiere alliance, soient veuz pour retrancher & reformer celles qui peuuent nuire & affoiblir celle de France. Dequoy l'Ambassadeur de la seigneurie doit

cōferer avec ceux du Conseil du Roy. Ceste procedure ne peut estre iustemēt reprise & blasmee, MonNepueu, que par ceux qui cherchēt querelle & preferent leurs passions au bien de la France: mais qu'y ail que l'on n'inuente & que l'on ne publie pour descrier ma regence, & les seruiteurs du Roy qui trauaillent iournellement auprès de moy, pour s'acquitter fidellement de leurs charges. Nous voyons clairement que l'on s'adresse à eux, pour en espargnāt mon nom en papier, faire tomber sur moy par effect, les reproches dont l'on les charge. Tant y a que personne ne peut nier que le Royanme ne iouisse à present d'une felicité plus digne d'admiration, & partant d'honneur & de louange pour ceux qui seruent, que d'aucun reproche: Ce sont gens vieilliss dedans les affaires publiques & les charges qu'ils exercent: Si le soing qu'ils y employent avec beaucoup de fidelité, d'enuie & de labeur, doit estre baptisé du tiltre d'ambition & conuoitise de gouuerner, i'aduouë qu'ils sont coupables. En tout cas, mon Nepueu, les fautes sont personnelles. Si aucun d'eux s'est tant oublié que de manquer au deuoir de sa charge, & mesmes à vous seruir, i'entends plustost le condamner que de l'excuser. Mais ie sçay qu'ils en ont vsé autrement, & que vous auez plus de subiet de vous louer de l'honneur qu'ils vous ont tousiours rendu, & du seruice qu'ils vous ont faict auprez du Roy & de moy, & au public, que vous n'auiez de les tenir pour tels que vous les depeignez, & neantmoins ie veux me plaindre

à vous de vous estre par trop deffié de vostre creance , & puissance enuers moy , & de mon affection enuers vous, d'auoir laissé passer tant de temps depuis ma Regence , sans m'auoir descouuert leurs deportemens, si vous les auez recoguuz preiudiciables au public: Car i'y eusse pourueu par vostre bon aduis , & me promets tant de la reuerence qu'ils portent à mes volontez & à vostre personne , que seulement pour nous complaire, & se descharger du fardeau qu'ils supportent, & contenter le public, ils auroient librement eux mesmes remis leurs charges en ma disposition , au premier signe qu'ils en eussent receu de moy, comme ils m'ont particulierement & publiquement déclaré sur vostre dicte plainte, qu'ils sont encores prests à faire à la premiere sermonce qui leur en sera faite de ma part. Pareillement ma condition seroit bien dure , & mon pouuoir restraint , s'il ne m'estoit loisible de remunerer de biens , & d'honneur, (sans faire preiudice au Roy, u'y au public) vne longue seruitude accompagnée d'une fidelité esprouuée? Voudriez vous estre reduit à tels termes pour ceux qui vous seruent? Vous nous auez bien faict cognoistre que vos pretentions & intentions sont bien esloignées de ceste restriction , laquelle aussi doit estre iugée de vous peu equitable pour les autres. Semblablement ie recognois que le Roy eust esté mieux seruy , si nous eussions reiglé vn Conseil pour les affaires d'estat, composé seulement de vous & des autres Princes, avec les

Officiers de la Couronne. Mais qui a plus desiré cela, & qui y a plus trauaillé que moy, à quoy veritablement i'ay esté mal assissee de tous. Et toutesfois maintenant vous vous seruez de ce subiet & de la confusion dudit Conseil, pour descrier les seruiteurs du Roy & le gouuernement : Seroit-ce pas vn grand honneur & aduantage, & vne pareille descharge pour ceux qui les manient, à cause de leurs Offices, si les depeschés à mesure qu'elles sont receuës, & que les responses sont ordonnees & dressees, elles estoient leues en vn Conseil reiglé & compose de personnes de telle qualité. Pour le moins leur labeur & leur diligence, avec leur suffisance, seroient mieux cognues, & toutes choses seroient veritablement mieux ordonnees. Vous deuez vous souuenir que voyant que ie ne pouuois paruenir à la reduction, & reformation dudit Conseil, par faute d'assistance, i'auois trouué bon que ceux qui ont les charges des depeschés & des finances, vous veüssent par fois en vostre maison, & receüssent vos aduis sur icelles, pour les me représenter, pour vous témoigner l'estime que ie fais de vous, & ma confiance en toutes choses: mais vous vous estes pluost lassé de cét ordre que vous n'avez fait paroistre d'en desirer la continuation: Outre cela, on a voulu vous faire trouuer mauuaise mon entree au Conseil des affaires des prouinces, comme si ma presence deuoit y estre incompatible avec la vostre, & en quelque sorte retrancher le respect qui vous est deu, chose veritablemēt qui seroit adue-

nuë contre mon intention; l'aduouë bien d'estre
tres jalouse du bien des affaires du Roy. Mais de
qui dois-je esperer d'estre mieux secondée en ce-
la que de vous, estant ce que vous estes? Or mon
Nepueu, pour bien faire au public, vous de-
uiez demeurer aupres du Roy, & de moy, vostre
qualité de premier Prince du sang vous eust don-
né toute creance & autorité pour estre oüy, &
creu, sans autre assistance que de la iustice, &
de la verité de vostre remonstrance. Vous eussiez
cogneu & esprouué par vrays effects, que mon
affection enuers le public surmonte de beaucoup
celle que ie rends aux particuliers de toutes qua-
litez. Vous m'eussiez trouuée tres-desireuse de
la conuocation, & du remede desdicts Estats ge-
neraux pour estre tenus en la forme ancien-
ne, en laquelle chacun trouuera la seureté &
liberté qu'il conuient, pour y comparoistre,
& y bien seruir le Roy, & le public, souz la
protection de son autorité souueraine, & de
sa iustice, telle qu'elle doit estre attenduë, &
desirée de tous. Mais prenez garde que souz
pretexte de la demande, que l'on vous faict
faire en termes generaux de rendre lesdicts E-
stats, seurs & libres, l'on ne minute & pro-
iecte desia des difficultez pour eluder & ane-
antir ladite assemblée, & en auorter le fruct
deuant la naissance au preiudice du public,
contre vostre attente, & vostre proposition.
Ceux qui auroient ce dessein estimeroyent neant-
moins de n'auoir peu gagné, en faueur de leur
party, d'auoir par anticipation semé dedans
les

les esprits des hommes, l'esperance de ladite assemblée, fondée sur ladite reformation, quand bien elle deuroit apres tourner en fumée, pour renuerfer sur les autres vn mescontentement general del'interruption d'icelle, duquel ils seroient neantmoins seuls causes. Ce que vous m'avez mandé auoir esté deliberé icy d'arrester la personne dudit Duc de Bouillon, me donne ce soupçon: Car comme tel aduis est imaginaire, faux & plain d'artifice, procedant d'une profonde malice, ie ne puis que ie n'apprehende dès à present la rencontre à l'aduenir de semblables ruzes & inuentions, mesmes lors qu'il faudra donner entrée à ladite assemblée d'Estats, Partant vous y aduiserez, & y pouruoierez de bonne heure. Mais ie ne puis bonnement croire que mon Cousin le Duc de Longueuille ayt rapporté que ie luy aye refusé d'aller en son gouuernement, bien l'auoys-ie moy mesme prié d'attendre quelques iours à partir, pour resoudre avec luy les Estats des garnisons, & fortifications des places dudit pays, en la forme accoustumée, à quoy il eust trouué à redire, & à se plaindre, si i'y eusse touché sans luy. De sorte que i'ay bien plus grande, & iuste cause de me douloir de luy, de quoy m'ayant, apres diuerses instances, faict asseurer qu'il me donneroit ce delay, il s'est desrobé de nous à heure induë, pour tesmoigner à tout le monde la mesfiance qu'il a de ma foy, laquelle n'a toutesfois encore defaillly à personne viuante, graces à Dieu. Ce proceder fut cause, que m'ayant esté rapporté que

le Duc de Vendosme auoit longuement conféré avec ledit Duc de Longueuille, le mesme iour de son depart, Ioint les diuers, & frequents aduis qui m'estoyēt donnez, des preparatifs qu'il faisoit, pour, à son imitation, se desrober, Je pris Conseil (meuë du soin que ie veux auoir de sa fortune & de sa reputation, pour le respect que ie dois, & veux rendre toute ma vie à la memoire du feu Roy, mondit seigneur) de le faire retenir en sa chambre, dedans le Louure, non à autre fin, que pour le garantir d'une desobeissance, en laquelle ie le voyois prest à se precipiter: ce qu'il a mal reconnu. Et veritablement sa faute, & mesconnoissance en cela, est plus blasmable en luy qu'en vn autre: Vous en sçauiez les raisons, que vous auez quelquesfois employées pour l'accuser, & le reprendre: Mais c'estoit lors que ledit Duc auoit recours à d'autres qu'à vous, pour estre supporté en ses ieunesses. Quant à la Citadelle de Bourg, comme elle auoit esté bastie par feu Monsieur de Sauoye, exprés pour nuire à la France, elle a esté razée depuis, pour en asseurer la conseruation. L'argent qui a esté employé pour recompenser les seruices, & les merites du sieur de Boisse, qui y commandoit, n'incommodera point le Roy, mais plustost soulagera ses finances: Car ce n'est qu'une aduance qui fera bien tost recompensee par l'espargne de la garnison qui y seruoit, laquelle montoit par année beaucoup: de façon que ce Conseil qui a esté approuué de plusieurs, fera vtile à la France: Tout ainsi que l'argent employé pour retirer le Chasteau d'Amboise des

mains de celuy qui le gardoit, le fera aux villes
 assises sur la Riuere de Loire, qui ont receu,
 avec le pays, de grandes incommoditez durant
 la guerre par la garnison qui y estoit. C'a esté
 doncques pour mettre ledit pays en seureté,
 tirer de crainte les habitans d'iceluy, que ladite
 recompense a esté donnée. Mon Nepueu, il est
 facile de descrire les actions de ceux qui manient
 les affaires publiques, le nombre des mal-con-
 tens & enuieux du bien d'autrui est grand : le
 desir de ceux qui s'ennuyent du repos n'est pas
 moindre. Et combien que depuis le trespas du
 feu Roy i'aye fauorisé l'ordre Ecclesiastique, ce-
 luy de la Noblesse, & faict soulager le peuple
 tant qu'il m'a esté possible : Toutesfois il sem-
 ble, par vostre dite lettre, que vous pretendez
 leur faire croire qu'ils ont esté, & sont mal trait-
 tez. Si contre mon esperance, & la raison, au-
 cuns d'eux se laissent aller à telles inductions &
 persuasions, ils esprouueront bien tost apres par
 experience, & par effects, qu'ils auront empiré
 leur condition. I'ay en toutes choses suyui les
 traces du feu Roy, mondit Seigneur, en leur
 endroit, pour leur bien faire : I'ay distribué des
 graces parmy les deux premiers Estats, avec soin
 & iugement, bien marrie de ne les auoir peu
 traiter mieux. Tant y a que les gens d'Eglise
 ont exercé leurs fonctions, & ioüy de leurs be-
 nefices en toute liberté & seureté. Plus grand
 nombre de Gentils-hommes de qualité, dedans
 les Prouinces, ont esté gratifiez & fauorisez par
 moy, que du temps du feu Roy : Plus de com-

pagnies de gens-d'armes entretenuës. Quant à la vente & charté des offices, & des charges de la maison du Roy, & des prouinces, elle n'a esté introduicte de mon temps, ie recognois & resents les maux qui en procedent : C'est pourquoy j'ay recherché & tenté les moyens de retrancher & faire cesser la cause principale desdicts excez : Aucunes compagnies souueraines s'y sont opposées, qui sont d'ailleurs pleines d'affection & de zele au bien public. Leurs raisons qui ont esté balancées au poids de l'interest particulier, ont pour ceste fois, & en ceste occasion, esté approuuées, non de ma volonté, mais par nécessité. I'espere que nous pouruoirons à ce desordre, qui n'est des moins dommageables à l'estat, par l'aduis, & avec l'aide desdicts Estats generaux. Je ne diray rien des autres, Car ie n'en ay cognoissance que par la plaincte generale que vous en faictes : Mais ie sçay bien que plus de personnes de tous estats ont beaucoup plus de sujet de se louer de leur condition presente, que ne voudroyent ceux qui les veulent rendre mal contents par dessein, & par force. Plusieurs se lamentent & font bruiet de certaines commissions extraordinaires, & des impositions du sel, qui sçauent bien que lesdites impositions ont esté moderées depuis ma regence, & la plus grande partie desdites commissions, reuouées. Ils forment telles plainctes, & les jettent aux yeux d'un chacun, plus pour les esblouir & acquérir creance, que pour soin & intention qu'ils ayent de les en soulager. C'est pour fortifier leurs

cabales, & toutesfois i'espere que les plus sages se garderont bien de chopper contre ceste pierre, la memoire des playes, & des miseres & calamitez pallées prouenues des guerres ciuiles, est encores trop fraische, & viue dedans les cœurs, & les biens d'un chacun : En tout cas, ie ne doute point que ceux qui se laisseront surprendre aux esperances d'une pretendue reformation, & d'un soulagement public, par telles voyes ne s'en repentent bien tost. Les Ecclesiastiques cognoistront par la suite de semblables amorces, qu'elles ne sont proposees que pour auancer la ruine & desolation de leur ordre, avec la Religion Catholique. Mais sur quoy est fondée vostre plainte qui regarde la Sorbonne ? L'on a semé à poste dedans ce College venerable la discorde, pour former un schisme, non seulement en ceste compagnie, mais en toute l'Eglise Catholique de ce Royaume : I'y ay opposé & employé l'autorité du Roy & la mienne, non pour nourrir leur diuision, mais par bonnes remonstrances & exhortations, la composer, & en empescher le cours : qui a-il à redire & reprendre en ceste procedure ? autres ne peuuent la trouuer mauuaise, que ceux qui pretendent profiter de ladite diuision, comme trop souuent ils ont fait de celles qu'ils ont introduites & espandues par tout où ils ont esté escoutez. Au contraire d'eux, I'ay soigneusement combattu & trauaillé en tous lieux pour composer lesdites diuisions à mesure qu'elles sont venues à ma cognoissance, & sçay que ceux qui nous accusent de les auoir entretenues, sont eux qui les ont for-

mées & en forgent encores de nouuelles iour-
 nellement , autant parmy les subiects du Roy,
 qui font profession de la Religion pretenduë re-
 formée (que l'on m'a iniustement attribuées)
 qu'à l'endroit des Catholiques, sans en cela espar-
 gner les Princes & les grands du Royaume, en
 leurs propres maisons & familles : dequoy vous
 & ceux qui vous assistent ne demeurerez long
 temps sans vous ressentir vous mesmes, & les au-
 tres aussi: Mais ce sera après que vous serez si auât
 engagez en leurs conseils, que vous ne pourrez
 plus vous en retirer & desueloper, qu'à leur mer-
 cy & discretion. Si ie pouuois vous représenter
 par vne lettre les recors & presages sur cela du feu
 Roy, mondit seigneur, ie les vous exposerois
 volontiers, tant i'apprehende pour vous, & les
 autres Princes qui sont pres de vous, & pour le
 public, les disgraces, & malheurs qui sont ineu-
 itables en la poursuite du dessein auquel l'on vous
 a embarqué. Vous protestez, mon Nepueu, de
 vouloir proceder en celle de la susdite reforma-
 tion, par moyens legitimes, & non par armes : Je
 veux croire vostre intention estre telle, mais pre-
 nez garde que l'on ne vous engage à pis faire, &
 sur tout à bastir vn party dedans le Royaume, qui
 sans la permission de l'autorité souueraine ne
 peut estre legitime, si faire cela n'est faire la guerre
 ouuertement, C'est forcer le Roy de s'y opposer
 par toutes voyes, C'est sonner la trompette pour
 les perturbateurs du repos public, & introduire,
 & commencer vne espeece de guerre, pire que celle
 des armes: & partant au lieu de bien faire à l'Estat,

en aduancer la desolation. I'espere tât de la loyauté de ceste genereuse Noblesse, qui a tousiours exposé, & respandu liberalement son sang, pour defendre la personne de son Roy, & son autorité souueraine, qu'elle perseuerera fidellement en ce deuoir, nonobstant les artifices, & desguisemens dont l'on vse pour la seduire. Je nourriray, & esleueray aussi mon fils en la recognoissance, & remuneration du merite & des seruices d'icelle, à l'imitation du feu Roy, son pere, lequel assisté de ladite Noblesse, coniointe à la faueur du Ciel, & secondee de sa propre vertu, a sauué le vaisseau de la France, du naufrage qu'il a couru par l'entresuite des guerres ciuiles. Les villes ne detesteront ny fuiront pas moins les auteurs des causes & partialitez qui engendreront semblables effects: Car ils ne peuuent estre si couuerts en leurs desseins publics, ou priuez, que les Citoyens & habitans desdites villes, soient pour s'y laisser circonuenir. C'est pourquoy ie leur ay par aduance ordonné de se bien garder & de ne donner entrée en leursdictes villes à personne puissante assez pour s'en emparer, & leur donner la loy. Car le Roy, mondit sieur, & fils, & moy, ne pretendons pouruoir à leur seureté, que par l'entiere confiance & asseurance que nous auons de leur loyauté. La charge que i'ay m'a obligé à vser de ceste precaution contre les mouuemens qui fretilent: Laquelle ie m'asseure, Mon Nepueu, que vous approuuerez, Car elle est faicte non pour nuire à personne, mais pour garantir d'iniure & d'oppression, ceux auxquels ie dois protection. Mais pourquoy me re-

commandez vous par vostre dite lettre, le retour du Cheualier de Vendosme auprès du Roy, puis-que c'est chose que vous sçavez que i'ay ordonnée il y a plusieurs mois, il n'a esté retardé que pour le rendre porteur de l'obedience, qu'il faut que le Roy rende à nostre S. Pere le Pape, & au saint siege deüé à cause de son aduenement à la Couronne? Pretendez vous quelque aduantage de son retour, & de sa presence auprès du Roy, où si c'est par pure charité, & affection que vous faites ceste instance? Vous sçavez que ie sçay quels ont esté, & iusques où peuuent encores s'estendre les conseils & proiects des principaux auteurs de nos diuisions, le ne m'expliqueray pas plus auant, Il suffit que i'aye recogneu & éprouué la portée de leur conscience. Or mon Nepueu pour finir & cōclure la presente, le vous représenteray de nouveau, par forme de repetition, que pour veritablement faire cesser les desordres & excez, que vous pretendez auoir cours en ce Royaume, Il faut faire tout le contraire de ce que vous faites. Premièrement vous ne deuez vous tenir esloigné du Roy, ny de moy, comme vous faites, ains nous fortifier au plustost de vostre assistance, avec laquelle nous pouuons facilement pouruoir à toutes choses necessaires pour le bien de tous. Secondement, Vous ne deuez authoriser de vostre nom, vne diuision entre les Princes, Seigneurs, & maisons Catholiques du Royaume, laquelle a esté indubitablemēt forgée par tels, qui peut estre n'esperēt pas moins en profiter quelque iour, à vostre propre dommage qu'au mien. Finablement, vous deuez vous ab-

stenir

stenir de blasmer publiquement, comme vous faites, le gouvernement des affaires, & les Officiers qui y seruent, mesmes deuant que de vous en estre adresse à moy en particulier : Mais chacun ne cognoist que trop clairement aussi, que vous vous adressez à moy plustost qu'à eux. Pareillement vous ne deuiez permettre estre dressé des partis dedans l'Estat, y estre semé des schismes, diuisions, & detractions, le gouvernement descrié, Quel'on se plaigne des graces que i'ay faites, qui sont appellées maintenant prodigalitez, par ceux qui en ont recueilly, & employé le fruiet à leur aduantage, estre donné attainte à la paix publique, sagement & heureusement maintenuë depuis quatre ans, contre les diuers assauts & artifices employez pour la renuerser, exciter & émouuoir le Clergé, & la Noblesse, avec les habitans des villes, & le peuple, mesmes les compagnies souueraines, & tous les officiers à mescontentement : Vouloit exprés retarder les mariages contractez, pour après les renuerser avec la paix de la Chrestienté, après auoir esté approuuez par vous, & en auoir vous mesmes signé les contracts, ny permettre aussi en estre donné ialousie aux sujets du Roy, & à nos voisins, & faire celer exprés à mesme fin le mariage qui se traicte en Angleterre : Bref, interpreter à mal tout ce qui a esté faict, & qui a neantmoins heureusement succédé au bien, & aduantage des affaires du Roy, dedans & dehors le Royaume, depuis le trespas du feu Roy, mondit seigneur. Car faire toutes ces choses, & les accompagner encores de toutes sortes de practiques, enroolle-

mens de gens de guerre, & recherche d'estrangers, Il faut que ie vous die, avec la mesme liberté, que vous m'avez escrit, & adressé vostre dite lettre, & l'avez depuis semée, & respandue par tout, que ce n'est le droict chemin qu'il faut tenir, pour veritablement reformer l'Estat par moyens legitimes comme vous le protestez: Et demander encores, en suite de cela, vne assemblée conditionnée de seureté, & de liberté, c'est à dire, à la mode, & au goust de ceux qui vous donnent tels conseils, qui, peut estre, ont dès à present pour but (souz pre-texte de ceste pretendue seureté, & liberté) d'en renuerser, & empescher du tout l'effect, comme ie vous ay cy deuant dit, par où il semble que l'on n'ait autre visée que d'esbloüir les yeux d'un chacun, par la proposition de ladite assemblée, pour faire croire que ie l'apprehende avec ceux qui seruent le Roy aupres de moy, & neantmoins nous la desirons plus que tous, & espere que nous en profiterons aussi pour le bien, & le seruice du Roy, & du Royaume, plus que tous. Au moyen dequoy, mon Nepueu, si vous voulez que le Roy, & moy, & tous ses bons seruiteurs, & subiects, croyons que vous aspirez veritablement à la susdite reformation, par bons & legitimes moyens, & en intention de bien faire, Changez, ie vous prie, vostre conduite & procedure, car indubitablement celle que vous avez choisie, auancera, & augmentera plustost la confusion, & les desordres, qu'elle ne les retrâchera à la desolation generale du Royaume, & partant à vostre des-advantage, comme au nostre, & reuenez nous trouuer avec ceux qui sont

conioincts avec vous en ce proiect. Vous, & eux y ferez receus avec honneur & confiance, faisans cesser par effect toutes sortes de menées & pratiques qui ont cours par les prouinces du Royaume, & au dehors. Que personne n'entre en doute des armes du Roy, car elles seront employées à la deffence commune & indifferente de tous. Auancons en diligence, & attendons avec patience le succez de ladicte assemblée generale des Estats du Royaume, s'il y a du mal au maniement des affaires publiques, & de l'excés de pouuoir en ceux qui les manient (iaçoit que ie ne me sois apperceuë qu'il en ayt esté abusé) i'y remedieray avec vous. Partant ie vous conuie derechef, & coniure par l'interest que vous auez au bien de ce Royaume, de vous rendre auprès du Roy au plustost & deuant que les maux (qu'engendre vostre esloignement, & le chemin que vous auez ouuert) prennent plus profonde racine, vous y trouuerez la place qui vous y est deüe, elle vous est reseruée entiere avec soin & affection, par le Roy, mondit sieur & fils, comme par moy. Il est graces à Dieu doiüé d'un esprit & naturel plein de benignité & de vigueur, Il est nourry & esleué en la crainte de Dieu, & à discerner & recognoistre ceux qui l'affectionnent à la proportion de leurs qualitez, merites & seruices: Je vous promets qu'il vous cherira comme vostre sang veut qu'il face, & ie remedieray facilement avec vous aux pretendues inegalitez & differences que vous dittes apparoir en ces deportemens: En fin ie continueray à contribuer de mon costé les offices & enseignemens qui

dépendent de moy, tant enuers luy, qu'ailleurs,
pour vous donner tout sujet de vous louer de ma
bien-veillance, & à tous les autres de ma condui-
te en toutes choses. A tant ie prie Dieu, mon
Nepueu, qu'il vous ait en sa sainte & digne gar-
de. Et écrit à Paris, le vingt-septiesme iour de Feb-
ruier, 1614.

Vostre plus affectionnée Tante

MARIE.





